

Tidak boleh menyekat laporan bohong

Malaysia tolak alasan Australia

KUALA LUMPUR 27 Julai — Malaysia tidak dapat menerima alasan Australia bahawa ia tidak boleh menyekat media massanya dari menyiarkan laporan yang bohong, tegas Perdana Menteri, Dato' Sri Dr. Mahathir Mohamad.

"Kita sedar adanya kebebasan akhbar di sana begitu juga di Malaysia tetapi akhbar yang sengaja berbohong bukanlah bermakna kebebasan," katanya.

Beliau berkata demikian ketika diminta mengulas hasil peremuannya dengan Menteri Luar Australia, Senator Gareth Evans di sini Selasa lalu.

Senator Evans yang berada di sini untuk menghadiri persidangan selepas Mesyuarat Menteri-Menteri Luar ASEAN

(PMC) juga bertindak sebagai utusan khas Perdana Menteri Bob Hawke untuk menyelesaikan masalah yang merenggangkan hubungan Malaysia - Australia.

Senator Evans dalam beberapa kenyataan menyentuh tentang laporan media massa Australia yang menyinggung perasaan Malaysia memberitahu, kerajaannya tidak mempunyai kuasa menyekatnya kerana negaranya mengamalkan kebebasan akhbar.

Bercakap dalam sidang akhbar selepas mesyuarat Majlis Tertinggi UMNO di sini, beliau berkata ramai orang asing merasa negara ini tidak mempunyai kebebasan akhbar kerana mereka cuma membaca akhbar New

Straits Times, Utusan Malaysia dan Berita Harian.

"Tetapi mereka tidak membaca akhbar Harakah, Watan dan Rokat yang membuktikan akhbar di negara ini juga bebas."

"Kebebasan bermakna menceritakan apa yang benar, tetapi nampaknya di Australia kebebasannya lebih daripada biasa.

"Ini pendapat kita, sama ada dia setuju atau tidak kita tidak peduli kerana pada pendapat kita kebebasan akhbar tidak termasuk membuat cerita memburrakkan orang," ujanya.

Menyentuh tentang pertemuannya dengan Evans, Dato' Sri Dr. Mahathir berkata, Australia nampak bersetuju dengan Malaysia tetapi "saya katalah kita tengoklah apa jadi selepas ini."

Bagaimanapun Perdana Menteri memberitahu, Malaysia bersetuju dengan beberapa jaminan Australia dalam usaha memulihkan semula hubungannya dengan negara ini.

Beliau berkata, antara jaminan yang diberikan ialah kerajaan Australia akan mengasingkan diri daripada apa yang dibuat oleh beberapa buah pertubuhan negara itu serta berkecuali dalam beberapa perkara.

Ditanya tentang pendapat yang mengatakan cadangan Jepun untuk menjadikan PMC sebagai forum tetap membincangkan soal keselamatan sebagai tolak ansur negara itu untuk menerima Kumpulan Ekonomi Asia Timur (EAEG), Dato' Sri Dr. Mahathir menafikan kemungkinan tersebut.